

• Әлем және Қазақстан

Ғаламдық этика Жер планетасын қорғайды



Астанада 23 тамызда басталатын «Мәдениеттер жақындасуының халықаралық онжылдығының» ресми тұсаукесері аясында ЮНЕСКО-ның «Ғаламдық этика: Жер планетасын сақтаймыз» атты халықаралық конференциясы болып өтті. Онда жердегі әлеуметтік және мәдени жүйелердің тұрақтылығын сақтауды көздейтін «Жаһандық этиканың» өзекті мәселелерін қолдау және дамыту жолында халықаралық қоғамдастықтың күш-жігерін үйлестіру жайы талқыланды.

Серік ПИРНАЗАР,
«Егемен Қазақстан».

Конференцияның басты мақсаты адамның әмбебап құқықтарына негізделген ғаламдық этиканы ынталандыру, мәдениетаралық диалог пен барша үшін әлеуметтік теңдікті орнату арқылы тұрақты дамуды

одан әрі қамтамасыз ету болып табылады. Ал іс-шараның ашылу салтанатына ЮНЕСКО мен ИСЕКО істері жөніндегі Қазақстан ұлттық комиссиясының төрағасы Иманғали Тасмағамбетов, Қазақстан Парламенті Мәжілісінің депутаты Дариға Назарбаева, Мәдениет және ақпарат вице-министрі Асқар

Бөрібаев, ЮНЕСКО-ның Бүкіләлемдік клубтар, орталықтар, ассоциациялар федерациясының президенті Джордж Христофидес, ЮНЕСКО-ның Азия-Тынық мұхит клубтар, орталықтар және ассоциациялар федерациясының президенті Джей Кун Ю қатысты.

– Бұл жолғы диалог алдағы айда Нью-Йоркте орналасқан БҰҰ-ның бас кеңсесінде жалғасын табады. Онда жаһандық құндылықтар жайы ортаға түседі. Ең маңыздысы, біз осы форумда түзілген ұсыныстарымызды сонда түгел ұсынатын боламыз, – деді Джордж Христофидес. – Бүгін біз, сәл кешірек, арнайы комиссия жұмысының нәтижесін көреміз: комиссия бізге «Астана

Декларациясының» жобасын ұсынады. Осының барлығы қазіргі кезде Астананың өте маңызды рөл атқаратындығына айғақ бола алады.

Ол өз сөзінде сонымен қатар, Еуропа мен Азияның ортасында, Еуразия жүрегінде орналасқандықтан, Қазақстанның мәдениеттерді жақындастырудың жаһандық ауқымдағы үрдісінде атқаратын рөлінің айрықша екеніне назар аударды. Бұдан кейін Джей Кун Ю бұл істегі Қазақстан лидерінің ерекше еңбегін атап өтті.

– Мен Қазақстандағы тұлғалардың әлемдегі бейбітшілік пен келісімге қатысты көптеген мәселелер бойынша үлкен қамқорлық танытып отырғанына куә болдым, – деді ол. – Қазақстан

қонақжай, достық пейілдегі мейірдан ел болып табылады. Қазақ елі көптеген мәдениеттердің мұрасына ие. Қазақ елінен біз үйлесімнің үлгісін көріп отырмыз. Осының арқасында Қазақстан айтарлықтай экономикалық өсімге қол жеткізуде. Мұның барлығы таңғалдырады, таңдай қақтырады. Қазақстан қоғамы айқын жолдың арқасында тұрақты дамуда. Қазақ елінде орныққан құндылықтар дамумен үндесуде.

Конференцияға қатысушылар бүгін «Мәдениеттер жақындасуының халықаралық онжылдығының» тұсаукесеріне қатысады.

Суретті түсірген
Ерлан ОМАРОВ.